

князь полки ставити около себя, и се внезапно приспеша татарове на Сить противу князю Юрью. Юрьи же князь отложив всю печаль и поиде к ним, и сступишася обои их полцы, и бысть сеча зла и велика, и побегоша пред иноплеменицы. **И ту убиен бысть велики князь Юрьи Всеволодич на реце на Сити.** И воя его много, много побита. А Василка Константиновича руками яша и ведоша во станы своя с великою нужею. И дошед Шерньскаго леса и стаща станы ту, и нудиша Василка много проклятии безбожни татарове в поганской воле их быти и воевати с ними. Он же не повинуся обычаю их, никакже не покорися беззаконию их, ни брашна, ни пития их не прия, но сие противу им глаголаше: “Глухое царство и скверное, никакже мене отлучите от християнския веры, аще бо и в велице беде есмь велми, но се ми наведе бог грех моих ради; богу же како ответ даете, ему же многи души погубили?” Они же скректаша зубы своими на нь желающе насытитися крови его. И бе бо лице его уныло от многа томления от поганых и весь разливавшаяся слезами, поминая преже сотворенный грехи. И тако возведе очи на небо и рече молитва: “Господи, ты веси вся тайная сердца моего и вся моя мысли, и сие годе бысть твоему милосердию”. И второе помолися, глаголя: “Господи Исусе Христе, помогавы мене многажды, избави мя от сих плодоядец! Господи, всенерукотворенный царю, спаси любящих тя прошения, еже аз прошу, дай же ми, помози христьяном и спаси раба твоего и чада моя Бориса и Глеба, и отца моего епископа Кирила, и жену мою Марию”. И паки третье пом[ол]ися, глаголя: “Благодарю тя, господи, боже мой, кую ти похвальную память твою вижю, яко благая моя память жерлем погибает, и только ми тело увядает и проче мысли сердца моего”. Тайно въздыхаше, моляшеся богу: “Господи Исусе Христе, вседержителю, приими дух мой, да и аз почию во славе твоей”. И сие рек, и ту абие немилостивно убиен бысть. Си злоба сключися месяца марта 4, вче[тверто]к 4 недели поста. Блажены же епископ Кирил иде з Белаозера, тамо избыв ратных, и приде на место, где же убили великого князя Юрья, и обрете тело, взявше ее и принесе в Ростов, и пев над ним обычная пения со игумены и с попы со крылошаны со многим плачем, вложиша и во гроб во церкви святых Богородица. А Василку же убиену и повержену бывшу на лесе. И виде етера жена верна и поведи мужу богобоязливу, и взяша тело его и плащаницею обвить, и положиша в скровнем месте. Уведав же се епископ Кирил и княгини Василкова и пославша, взяша тело его. И яко понесоша во град Ростов, и много множество народа изыдоша противу сему, жалостные слезы испущающе и оставше такового утешения. И видяще се возлюблени суету жития человека, иже вчера славою украшен и гордися о боярех, а ныне перст и прах; в мале являеця, а вскоре погибает; но помянем своя грехи и покаемся. Плач же бысть мног народа правоверных, зряща отца сирым и кормителя отходящим и печальным великое утешение, и омраченным звезду светоносную зашедшую. На весь бо церковны чин отверсты име очи сердечней ко всем церковником и к нищим, и печальным, яко возлюбленный бже отец, паче же и на милосты-